

諸佛世尊如來菩薩尊者名稱歌曲卷第四

十七

赤七

大雄氏以大善因緣普化萬有使人修善滅惡以成覺道。誠苦海之津梁。畏途之階梯也。夫善者人所固有之理也。本來至善。未嘗有惡。有為惡者是喪其善。非本來惡也。然善惡有報。皆人自取。故曰積善之家必有餘慶。積不善之家必有餘殃。善不積不足以成名。惡不積不足以滅身。小人以小善為無益而弗為也。以小惡為無傷而弗去也。故惡積而不

可掩罪大而不可解。惟上帝不常作善降之百祥。作不善降之百殃。為善者天報之以福。為惡者天報之以殃。為善則善應。為惡則惡報。祥者福之先也。見祥而為不善。則福不生。殃者禍之先也。見殃而能為善。則禍不至。從善如登。從惡如崩。善惡之積。各以類應。人有正理。必當為善。而不可為惡。天有常道。為善者必佑。為惡者必罰。積善在身。猶長日加益。而人不知也。積惡在身。猶火銷膏。而人不見也。天道聰明。佑善而災惡。善惡施也。禍福報

也。人報其陽。天報其陰。善惡之感萌於心。災祥之應見於事。終身行善。善猶不足。一日為惡。惡自有餘。修一念善。遠階覺道。起一念惡。長淪苦海。小善不積。大德不成。小惡不止。以成大罪。為善不求福而福至。為惡不求禍而禍生。為善者善氣生。為惡者惡氣生。積善逢善。積惡逢惡。善有善報。惡有惡報。積善善種。積惡惡至。如影逐形。似響隨聲。一日行善。福雖未至。禍自遠矣。一日行惡。禍雖未至。福自遠矣。天網恢恢。報應甚速。修善福應。為惡禍

來。積善有慶。集積惡有殃。害君子不謂小善不足為也。而舍之。小善積而為大善。不謂小不善而無傷也。而為之。小不善積而為大不善。善不在大。惡不在小。休休之福。積善所生。凶凶禍害。積惡所成。善惡異跡。同出於心。天下莫易於為善。莫難於為不善。天道福善禍淫。神明賞善罰惡。一念之動。若善若惡。夫必鑒之。一情善為賢人。一情惡為小人。一念纔起。趣向不同。善惡既殊。禍福即異。心起於善。善雖未為。吉神已隨之。心起於惡。惡雖未為。

凶神已隨之。德無常師。主善為師。為善最樂。積善存仁。必有榮華後裔。福緣善慶。多因積行而生。一言之善。須增萬福之祥。為善者不改其度。故能有濟也。善者因福而為福。德善日積。則福祿日臻。為善不求人知者。謂之陰德。故其施廣其惠博。天報必豐也。為人作善方便者。其後受惠崇善以廣德。則業泰而身安。為善者未嘗無報也。不以其實。則以其名不在其身。則在其子孫。修善立名者。亦猶菜室樹果。生則獲其利。死則遺其澤。善人種德。

降祥於天。人有善願。天必從之。聖人之道。以善為用。聖人之善。以孝為端。為善而不先其端。無善也。為道而不在其用。無道也。造善於陰。德報於顯。信善作福。積善不厭。信知陰德。久而彌彰。善言於心。終身為實。言不苟出行。不苟為擇善而從事焉。一言之善。貴於千金。一切善心。皆得真道。人有一善。百神俱泰。人有十善。司命儲筭。人有百善。東華注名。人有千善。福及七祖。萬善既備。白日登宸。慈為萬善之本。心若不慈。善何以立。在世積善。長行

陰隲者鬼神敬之。五福隨之。若人積善。天人扶衛。竟超福境。非積善陰德不足以感神。善濟物而不以為德。陰濟良善。則有福報。人能刻意為善。靜與道合。動與福會。所謂善人。人皆敬之。天道佑之。福祿隨之。眾邪遠之。君子貴遷善。遷善也者。聖人之徒歟。人誰無過。過而能改。善莫大焉。施善行戒。神即佑之。故禍莫大於從己之欲。惡莫甚於言人之非。惡氣之萌。本於惡念。為不善於幽。而蒙刑於幽。夫是之謂定論。人有不善之事。幸其人之不見。

不聞。安然自肆。無所畏忌。殊不知人之耳目。可掩。神之聰明。不可掩。惡不可積。過不可長。積惡長過。喪敗之源。誣善者亦反其事。不善所積。降殃有餘。不善者不容。不以罪加之也。司命奪算。殃及五世。貪生積惡。過重業集。地獄之報。有所不容。故人道莫大於為善。為善必先以忠孝。事君不忠。非孝也。事主不忠。不得壽終。事父母不安親。則禍憂至。事主而不盡力。則有刑。臣不復君之恩。苟營其私門。禍之原也。孝弟之至。通于神明。光于四海。無所

不通。忠孝友弟。止已化人。孝養父母。竭忠於君。十方善神。悉皆擁護。不忠不孝。罪之大惡。不忠君王。不孝父母。不敬師長。不友兄弟。不誠夫婦。不義朋友。不敬三寶。不重五穀。身三口四。大秤小斗。殺生害命。人百已千。姦私邪淫。妖巫叛逆。從微至著。三官鼓筆。太乙移文。即付五雷。斬勘之司。先斬其神。後勘其形。斬神誅鬼。使之顛倒。悖仁慈。虧忠孝。明則刑網理之。幽則鬼神誅之。昔日天王與無數天人來詣佛所。稽首言。以何等行。得爲日天。照四

天下。復以何緣。而爲月天。佛言有四事。一常喜布施。二修身慎行。三奉戒不犯。四然燈於佛寺。若於父母沙門道人。皆值光明。又身口意行不殺等十善。佛言又有四事。得爲月王。一布施貪墮。二奉持五戒。三恭事三尊。四冥設燈光於君父師等。如是修行。得爲月王。福樂無極。昔有衆生。身體頑痺。眉鬚墮落。舉身烘爛。鳥栖鹿宿。人跡永絕。沾汗親族。人不喜見。名之癩病。何罪所致。佛言。以前世時。坐不信三尊。不孝父母。破壞塔寺。剝脫道人。斫傷

聖賢傷害師長。無常返復。背恩忘義。常行苟且。婬匿尊卑。無所忌諱。故獲斯報。昔信相菩薩。重白佛言。世尊復有衆生。其形極醜。身黑如漆。兩耳復青。雙頰俱皁。炮面平鼻。兩眼黃赤。牙齒踈缺。口氣腥臭。尅短壅腫。大腹小腰。手脚縲戾。僂脊凸肋。費衣健食。惡瘡膿血。水腫乾涸。疥癩種種。諸惡集在其身。雖親附人。人不在意。若它作罪。橫罹其殃。永不見佛。永不聞法。不識菩薩。不識聖賢。從苦入苦。不得休息。何罪所致。佛言。以前世時。為子不孝。父

母。為臣不忠其君。為上不愛其下。為下不恭其上。朋友不償其信。鄉黨不以義從。斷事不以其道。心意顛倒。無有期度。殺害忠良。輕陵尊長。偷劫盜竊。惡業非一。美已惡人。侵陵孤老。誣謗賢善。輕慢師長。欺誑下賤。一切犯之。故獲斯罪。欲知前世因。今生受者是。要知未來因。今生作者是。假使百千劫。所作業不忘。因緣會遇時。果報還自受。淨業純熟。自覩佛身。惡果將成。心現地獄。果報好惡。定之於業。業因善惡。致使報有冥爽。昔鳩摩羅多。大士

既得法眼。至中天竺國。有大士名闍夜多。問曰。我家父母素信三寶。而常榮疾瘵。凡所營作。皆不如意。而我鄰家。久為旃陀羅行。而身常勇健。所作和合。彼何幸。我何辜。祖曰。何足疑乎。且善惡之報。有三時馬。凡人但見仁天暴壽。逆吉義凶。便謂無因果。虛罪福。殊不知影響相隨。毫釐靡忒。縱經百千萬劫。亦不磨滅。佛說業通三世者。蓋以前世所作善業。而報在此生。苟為不善。則應在來世。故人有此生。雖為善。而不得其福者。前惡之報勝也。今

世雖作惡。而不受其殃者。前善之報勝也。苟以今生非得福報。復務為惡。而來世益墮惡趣也。苟以此世得其福報。復務為善。而來世益得善趣也。又前世為善。其德方半。而改志為惡。及此生也。先福而後禍。此生為惡。其事方半。而變行為善。及來世也。先禍而後福。今汝父與汝之鄰。其善惡之應。不以類至。蓋先業而致然也。夫善惡報應。毫釐不差。但有久速不同。世之愚夫。愚婦。謂禍福無徵。謬矣。慈尊憐濟群倫。作大善方便。開甘露法門。使人

湔滌懺雪。改過遷善。化凶為吉。化災為祥。故以念佛功德為最勝第一福田。信心念佛是人善根福報無盡。若眾生心憶佛念佛。現前當來必定見佛。昔佛在王舍城迦蘭陀竹林時。那羅聚落多諸疫鬼。殺害民衆。莫能消弭。時有一優婆塞語衆云。如來在世。利安衆生。我等當共一心稱佛名號。以求救濟病苦。時諸人聞是語已。咸各同時稱佛名號。唯願世尊大悲憐愍。覆蔭我等疾苦。爾時世尊常以大悲晝夜六時。觀察衆生。誰受苦厄。尋往

度。使修善法。永拔諸苦。見此疫病人。民同時一心稱佛名號。以救疫病。爾時如來將諸比丘。往彼聚落。以大慈悲。熏諸民衆。勸令修善。疫病同時皆悉退散。無復衆患。昔有大善知識。篤修淨業。不輟念佛。嘗語人云。大願聖人方七從淨土來來。實無來。深心七凡夫從淨土去去。實無去。彼不來此。此不往彼。而其聖凡會遇。兩得交際。彌陀光明。如大圓月。徧照法界。念佛衆生。攝取不捨。諸佛心內。衆生塵塵極樂。衆生心中淨土。念念彌陀。若能發心念彼佛。

號即得往生。河沙諸佛有同舌之讚。十方菩薩有同生之心。佛言不信何言可信。不生淨土。何土可生。自棄己靈。是誰之咎。其人臨終見金臺從空而至。念佛之功有如是效驗。豈小補哉。佛言。有得聞寶海如來名號者。執持諷誦歡喜信樂。當得七覺意寶。得立不退轉地。疾成無上正真之道。却六十劫生死之罪。有得聞寶英如來名號。執持諷誦。倍過三千大千佛刹七寶布施功德。有得聞寶成如來名號者。執持諷誦。以清淨心歡喜信樂。却五

百劫生死之罪。有得聞光明世界寶光明如來名號者。執持諷誦。歡喜信樂。於三塗中。疾得解脫。有得聞寶幡幢如來名號者。持諷誦念歡喜信樂。其人則為成法珍寶。有得聞一切眾德光明世界寶光明如來名號者。持諷誦念歡喜信樂。信却二十萬劫生死之罪。有得聞阿閼如來名號者。捉持諷誦。歎說其德。復勸他人。令學諷誦。諸天魔王。天龍鬼神。咸加擁護。有得聞大光明如來名號者。執持諷誦。歡喜信樂。其人必得成就最正覺道。有得聞

無量音如來名號者淨心信樂。其人當得無量音聲。及得如來淨光之音。有得聞大名稱如來名號者淨心信樂。諷誦不忘。其功德過七寶阜。如須彌山布施。出巨億萬倍功德上。無與為比。有得聞寶光明如來名號者盡心信樂。持諷誦念亦六當却十劫生死之罪。住不退轉。必成無上正真之道。有得聞大安隱如來名號者歡喜信樂。諷誦不忘。持此功德。普使一切無量衆生皆得安隱。其人則受無量功德。有德聞火光明如來名號者歡喜信樂。持

諷誦讀。其人當得如來十力。有得聞正音聲如來名號者淨心信樂。持諷誦讀。其人當得如來四諦平等之法。其有得聞無限淨如來名號者歡喜信樂。持諷誦念。滿大千世界七寶布施。所得功德百千萬倍。無與為比。却生死罪四十八劫。有得聞月音如來名號者盡心信樂。持諷誦念。其人所得清淨功德。成具必滿。如月盛明。立不退轉。當成無上正真之道。有聞無限名稱如來名號者持其名號。歡喜信樂。諷誦。其福甚多。若積七寶如須彌山

持用布施。過出百倍。無以為比。有得聞日月
光如來名號者。歡喜敬禮誦念。其人速得成
就。無上正真之道。有得聞無垢光如來名號
者。歡喜信樂。敬禮誦念。成無上最正覺道。終
不墮三塗之中。有得聞瑠璃光世界淨光如
來名號者。歡喜作禮誦念。壽終當生天上。有
得聞日光如來名號者。歡喜樂念。降伏眾魔。
及諸外道。却四十劫生死之罪。有得聞無量
寶如來名號者。歡喜諷誦。當得七覺寶。能立
眾生於最寶中。眾德之聚。日日增益。有得聞

蓮華最尊如來名號者。歡喜諷誦。功德智慧。
日日增長。譬如蓮華從水湧出。却五千劫生
死之罪。有得聞身尊如來名號者。盡心諷誦。
其人疾度生死之海。能除眾生諸欲。於世間
作福田。能受三界一切供養。作大法師。得金
剛力。立不退轉。成無上正真之道。有得聞堅
固世界金光明如來名號者。歡喜誦念。當為
佛光明之所護持。悉得一切眾德。却十二劫
生死之罪。有得聞梵自在王如來名號者。歡
喜諷誦。必當見其佛作轉輪王。當成無上正

真之道。有得聞爲月世界金光明如來名號者。喜樂誦念。不墮惡道之中。與大德衆會。皆得快樂。後得作佛。有得聞金海如來名號者。盡心諷誦。得不退轉。必成正覺。有得聞龍自在王如來名號者。盡心諷誦。益增功德。必得往生此佛國。求最正覺。有得聞一切華香自在王如來名號者。淨心諷誦。當得諸佛智慧。却十劫生死之罪。有得聞樹王如來名號者。歡喜誦誦。當得諸魔破裂。有得聞勇猛執持牢杖棄捨鬪戰如來名號者。歡喜持誦。譬如

金剛伏衆魔兵。利益一切。所得功德。如恒河沙。諸佛國土。滿中七寶。持用布施。不可爲比。有得聞內豐珠光如來名號者。一心誦念。獲大功德。不畏三途之難。受天上人中快樂。常得生清淨佛土。有得聞無量香光明如來名號者。一心諷念。赤七成最正覺。諸毛孔中。出衆妙香。却四十劫生死之罪。有得聞師子響如來名號者。持誦誦讀。成最正覺。作衆德輪。却二十劫生死之罪。有得聞大強精進力如來名號者。得大戦力。退却衆魔。却二十五劫生死

之罪。有得聞過。出堅住。如來名號者。信樂持
諷。於諸尊法。得堅固財。加得大福。晝夜日日
增益功德。有得聞鼓音。王如來名號者。盡心
諷誦。其功德勝滿三千大千世界珍寶布施
有得聞月音。如來名號者。盡心誦念。却二十
一劫生死之罪。有得聞超出眾華。如來名號
者。盡心誦念。超出八難。多所利益。有得聞世
燈明。如來名號者。盡心誦念。脫三塗厄難。却
二十劫生死之罪。有得聞休多易寧。如來名
號者。盡心誦念。功德出上布施數百千倍。却

六十劫生死之罪。成無上正真之道。有得聞
現在說法寶輪。如來現在轉不退轉無上法
輪常滅度。如來現在廣說妙法淨覺。如來現
在廣說經法須彌步。如來現在說法寶蓮華
如來。一切眾寶普集。如來樹王豐長。如來轉
不退轉法輪。眾寶普集豐盈。如來圍繞特尊
清淨。如來宣揚稱讚。是諸如來名號。其人得
福不可限量。不可思議。有得聞日月燈明。如
來名號者。敬信誦念。必成正覺。其功德不可
限量。受一切三界供養。有得聞須彌如來名

號者歡喜誦念當得無比功德。猶須彌山堅住不動。日日增益。不可限量。有得聞大須彌如來名號者。信樂誦念。當成正覺。却八十劫生死之罪。有得聞阿提彌留如來名號者。盡心誦念。其功德過於滿三千大千世界。閻浮檀金布施。却十劫生死之罪。有得聞喻如須彌如來名號者。信樂誦念。智慧猶若大海。疾得成就正覺之道。有得聞香像如來名號者。恭敬諷誦。功德過上布施百倍。獲大利益。有得聞三蔓陀提提如來名號者。歡喜誦念。其

福德不可思議。却生死百劫之罪。有得聞無垢世界淨光如來名號者。歡喜誦念。所得功德不可稱量。却八十劫生死之罪。有得聞法最如來名號者。歡喜誦念。疾得正覺之道。却二十劫生死之罪。有得聞香自在王如來名號者。歡喜誦念。發大慈心。得福甚多。却三十劫生死之罪。有得聞大集如來名號者。信樂誦念。是人與諸佛法。常共合偶。亦不起意。樂人泥洹。有得聞香光明如來名號者。歡喜誦念。得不退轉。疾成正覺。在於三塗恐怖之中。

疾得解脫。有得聞火光。如來名號者。歡喜
諷誦。得無限之福。有得聞無量光。如來名號
者。淨意信樂。精勤諷念。却十劫生死之罪。有
得聞開光。如來名號者。歡喜諷誦。魔王衆兵
不能毀壞其道心。有得聞月燈光。如來名號
者。持諷誦念。當為世導首。當得受世之供養。
有得聞妙香。世界日月光。如來名號者。歡喜
誦念。當得無量功德之報。道心堅固。如須彌
山。不可傾動。一切魔王不能毀壞。有得聞日
月光。如來名號者。歡喜誦念。當具滿無上

道願。如此世尊。有得聞火光。如來名號者。信
樂誦念。已持智慧之炬。度越一切生死之海。
一切魔王不能毀壞其道心。有得聞衆色像
達鏡世界集音。如來名號者。喜樂誦念。後生
之處。常得端正。容顏妙好。心常歡喜。樂信諸
佛。有得聞最威儀。如來名號者。喜樂持念。得
世間最尊。天龍鬼神之所敬仰。却二十劫生
死之罪。有得聞光明尊。如來名號者。喜樂誦
念。衆生因此功德。會得成就正覺之道。却三
十劫生死之罪。有得聞蓮華軍。如來名號者。

喜樂誦念所得功德當超過三界。猶若蓮華從水湧出。有得聞蓮華響。如來名號者。樂喜諷念。終不墮於惡道。諸難疾得解脫。除五逆惡罪。有得聞多寶如來名號者。歡樂諷念。其所生在諸佛刹心常解。了一切諸法。有得聞師子吼如來名號者。歡樂諷念。聲揚法音。徧至三千。化度無量衆生。却五十劫生死之罪。有得聞師子音如來名號者。喜信誦念。得福無量。有得聞精進軍如來名號者。歡喜信樂。一心諷念。當成正覺。能為衆生廣轉法

輪。有得聞金剛踴躍如來名號者。信樂諷念。能破壞三毒。消散諸欲。得不退轉於佛法。有得聞度一切禪絕衆疑如來名號者。喜樂誦念。能壞衆魔兵。決散一切疑結。得成就正覺之道。有得聞寶大侍從如來名號者。歡喜誦念。能為世間作大寶明。當轉無上正法之輪。有得聞無憂如來名號者。信心誦念。不為諸欲汙染。如蓮華不著塵水。得不退轉。悉能安隱一切衆生。後成正覺。有得聞地力持踊如來名號者。淨心誦念。得不退轉。難動如地。一

切衆魔不能毀壞其人道心得無量慧。猶若大海斷生死路。却二十劫生死之罪。有得聞最踴躍如來名號者。歡喜誦念。當為最特殊妙大乘之所捉持。亦能饒益一切衆生。三塗八難。悉為永絕。有得聞自在王如來名號者。信樂誦念。得無量福果。有得聞無量音如來名號者。喜樂誦念。解了如來智慧。成無上正真之道。有得聞錠光如來名號者。歡喜誦念。當為如來光明之所護持。有得聞一切香世界寶光明如來名號者。歡喜誦念。當於世間

作大珍寶。住不退轉於正真之道。却五十劫生死之罪。有得聞無量壽如來名號者。一心誦念。當得無量福德。永離三塗之厄。命終之後。當往生彼佛刹土。有得聞殊勝如來名號者。喜樂誦念。能降伏衆魔。裂壞羅網。却六十劫生死之罪。有得聞伏一切魔世界集音如來名號者。樂持誦念。當得一切諸佛如來音聲。於廣說法處。以德特尊。降伏衆魔。却八十劫生死之罪。有得聞內豐嚴王如來名號者。歡喜誦念。得不退轉。成無上正真之道。却一

永樂北藏

諸佛菩薩尊者名稱歌曲

第一八〇册

劫生死之罪。有得聞金剛堅強。消伏壞散。如來名號者。喜樂誦念。當住不退轉。疾成無上正真之道。却十萬億劫生死之罪。有得聞寶如火如來名號者。喜信誦念。當立不退轉地。疾成無上正真之道。有得聞寶月光如來名號者。樂持誦念。得不中止。三昧正定。見諸佛轉尊法輪。悉能總持諸佛之法。有得聞賢最如來名號者。信樂誦念。於所生之處。為一切之所敬。言見信用。莫不稟從。獲斯功德。得無礙辯。有得聞蓮華步如來名號者。歡喜誦念。

後生之處。顏貌端正。殊妙無比。眾共敬愛。自識宿命。無數劫中事。皆悉了知。生所從來。所作善惡。悉皆識知。其所生處。所說言教。一切信奉。莫不承用。有得聞現在說法金寶光明如來。無量尊豐如來。無量尊離垢王如來。德亦七手如來。無數精進興豐如來。無言勝如來。無愚豐如來。月英豐如來。無量光豐如來。逆空光明如來。最清淨無量禱如來。好諦住惟王如來。成就一切諸刹。豐如來。淨慧德豐如來。淨輪禱如來。瑠璃光最豐如來。寶德步如來。

最清淨德寶住如來。度寶光明塔如來。無量
慙愧金如來。諸名號。敬心誦念。成大功德。得
大智慧。解了諸法。成一切正覺。有得聞蓮華
尊豐如來名號者。歡喜誦念於諸正覺一切
法中。便得成無上道。却生死罪三十六劫。有
得聞淨寶興豐如來名號者。歡喜樂念。得七
覺意寶。却三十劫生死之罪。有得聞電燈旛
王如來名號者。喜信誦念。遠離八難之處。終
不復生下劣之家。有得聞法空燈如來名號
者。樂持誦念。却六十劫生死之罪。得最正覺。

常得與諸佛共會。有得聞一切衆德成如來
名號者。六情端正。常得清淨。解了諸佛妙法。
却八十劫生死之罪。有得聞賢旛幢王如來
名號者。信樂誦念。得不退轉。成最正覺。却五
十劫生死之罪。有得聞一切寶緻色持如來
名號者。歡喜誦念。當得如來十力十八不共
特異之法。常能轉不退法輪。却六百劫生死
之罪。以念一佛如來名號。其獲功德各各如
是。而況於百千萬佛。及諸尊菩薩名號。是諸
佛世尊如來菩薩尊者名稱歌曲為諸功德。

之大海。所以利濟衆生。作無量方便。以如是
 頻伽音聲。以如是供養。以如是回向。以如是
 懺悔。所以弘化開導。使人成佛。凡閻浮提衆
 生。能歸依如是因地法門。一心向善。晝夜六
 時。勇猛精進。勤行不怠。如飢之欲食。渴之欲
 飲。朝念於斯。夕念於斯。念念皆發於心。心心
 即得成佛。若影之隨形。響之應聲。不難也。已
 其有根器頑鈍者。能專心淨意。堅心持誦。工
 夫之至。亦得成就。繩鋸木斷。水滴石穿。有得
 聞如是勝妙音聲。而生信解者。亦不墮三塗。

不生八難。不入泥犁。不受冤對。諸魔不能侵。
 外道不能害。具足恒如意。舉目見如來。自然
 成灌頂。登最正覺道。稽首歸依。發大歡喜。合
 掌頂禮而讚頌曰。

無量如來功德海 誰能得聞此尊名

廓開寶藏大巍巍 一切衆寶皆呈現

彼有緣者見諸寶 咸獲如意稱其心

彼無緣者具目觀 畢竟隔闕了無得

審諦二說何以故 由於癡慧能否分

惟此智慧精進人 聞諸勝號即興起

大發慈悲頂佛足
 譬如寶月行虛空
 聞此妙法而作者
 於一佛者之所然
 無量無邊大功德
 永與閻浮亦七作導師
 有求度滅不輪報
 一聲聖號聞諸天
 用一號普增衆德
 聞諸佛名能奉行
 住佛刹土演妙聲
 於諸世界無不照
 從正覺中得所依
 而況盡諸法界佛
 世世濟度諸衆生
 是法名能出有壞亦七
 敬禮稱揚諸佛尊
 矧此無量妙歌曲
 百千號不可思議
 念念不忘堅固意

彼下劣者有深業
 不能入此微妙義
 極大勇猛於法中
 端能勤求生大智
 一念興善受福報
 稱念佛聲無所違
 勤讚十方諸如來
 顯諸如來大聖德
 解使若人淨諸業
 諸佛遙讚亦復然
 若此深奧孰了知
 廣爲衆生說妙法
 住此刹土成就衆
 惟願最上德中王
 愍濟沉淪作大航
 受諸信行之供養
 得大歡喜波羅蜜
 度越無邊苦海中
 願使衆生皆成佛
 如蓮華開普大千

如來弘誓廣慈悲 五濁惡世濟度盡
有一衆生未成佛 終不於此取泥洹
衆生欽此如來心 發正覺心無退轉
晝夜勤勤念諸佛 道成即得見如來

諸佛世尊如來菩薩尊者名稱歌曲後序
稱念諸佛世尊如來菩薩尊者名號其功德
甚深廣大得福最多。以如是勝妙導人爲善
同修福果。夫所謂爲善者。即前之所云。忠於
君上。孝於父母。敬天地。奉祖宗。尊三寶。敬神

明遵王法。謹言行。不殺生。害命。廣行陰。臨是
也。世之善男子。善女人。有捨財以濟衆。有竭
力行方便。如是修善以積功德者。有之。惟稱
念諸佛世尊如來菩薩尊者名號。不費己財。
不用己力。而功德無量。佛云。所說諸佛名。顯
現諸佛行。有大威德相。以佛眼普見。若有智
慧人。當欲求菩提。應讀此佛名。不久得作佛。
又云。我昔無數劫時。於妙光佛末法之中。出
家學道。聞五十三佛名。聞已合掌。心生歡喜。
復教它人。令得聞持它人。聞已。展轉相教。乃

至三千人。此三千人異口同音。稱諸佛名。一心敬禮。以是因緣。功德力故。即得超越無數億劫生死之罪。其千人者華光佛為首。下至毗舍。於莊嚴劫得成佛道。過去千佛是也。此中千佛者拘樓孫佛為首。下至樓至如來於賢劫中次第成佛。後千佛者日光如來為首。下至須彌相於星宿劫中。當得成佛。現在十方諸佛。善得如來等。亦得聞知五十三佛名。故於十方世界。各得成佛。昔有人潛心淨業。日誦佛號萬聲。未嘗間絕。一日無疾沐浴面

西跏趺而化。異香馥郁。竟成佛果。昔有女人專心念佛。一日索火燒香。口云佛以華臺與我。我當得佛果。已而天華飛墜。遂爾坐化。若此者不可枚舉。姑略言其一。二耳。經云有人求佛道。而於一劫中。合掌在我前。以無數偈讚。由是讚佛故。得無量福德。今復述此于篇末。使凡起心念佛者。咸發歡喜心。咸得辯才學。咸領悟佛旨。咸得善神護。一切冤障業。悉得永脫離。稽首感佛恩。即得如來道。尚勉之哉。尚勉之哉。

永樂十五年四月十七日

御製諸佛世尊如來菩薩尊者名稱歌曲後序

如來作大方便。普利一切。閃濟三塗。開導迷惑。欲俾含靈蠢動。皆成佛道。功德廣大。不可思議。朕主宰天下。軫念群生。弘體慈悲。發歡

喜心。間取諸佛如來菩薩尊者名號。著為歌曲。廣布流通。俾人人受持誦誦。積善修因。以共成佛果。同臻快樂。此朕一視同仁之盛心也。然所著歌曲。無慮千百億佛。無一字而非真言。無一語而非至善。如布帛菽粟之濟人利世。不可一日而無者。善信之士。觀此勝妙希奇。務在虔恭至誠。堅心靜慮。齋潔焚香。頂禮讚諷。思惟坐卧之間。念念不忘。如此則諸佛如來為之感格。俾生享榮華。脫離諸惡苦趣。從無始以來。百千億劫。所積罪業。悉皆消

除。及則超登天堂。受諸快樂。至于子子孫孫。世臻福慶。九玄七祖。咸獲超升。苟惟不誠不敬。輕慢褻瀆。或飲酒茹葷。以此酣歌作樂。或穢言惡語。以此戲謔嘲咲。如此則諸佛如來。顯示譴罰。俾生罹諸惡苦趣。及墮無間地獄。至于子子孫孫。世淪惡業。九玄七祖。永墮沉冥。不得超濟。夫禍福無門。為人所召。善惡之報。不爽毫髮。究厥所由。持在吾心之誠與不誠而已。雖然。人非上智。孰能無過。苟能革偽以存誠。去汙以就潔。洗滌懺悔。如紅爐點雪。

消融淨盡。轉移之頃。可以改惡為善。化凶為吉。變地獄而為天堂。則其福德所及。有不可量。於乎。為善獲吉。為惡獲凶。理有必然。慈尊化度群倫。以念佛功德為最勝第一福田。信心念佛。是人善根。福報無量。朕於是編懇懇切切。無非欲人修善以滅惡。趨吉以避凶。期俾河沙刹土一切有情。均霑利益。同臻覺道。以共享太平之福。於無窮觀於此者。尚戒之哉。尚勗之哉。

永樂十八年正月初一日

永樂北藏

諸佛菩薩尊者名稱歌曲

第一八〇册

諸佛世尊如來菩薩尊者名稱歌曲卷第四
十七

非七

五源